

# 1 TXIMÓTXIO

## Merepanika Paoro Iokanatsopatakiti Tximótxiomoni

---

**1** <sup>1</sup>Nota Paoro iokanatsopata pite Tximótxiomoni. Xesosi Kristo iokanapirena sãpiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatano nota kãkitimoni, iokanapirena nisãpiretini ïkapani. <sup>2</sup>Pite Tximótxio, nota ãkiri atoko pitxaua, kotxi merepitipanika pauikari Xesosi sãkire nota sãpiretakasaakii. Aïri Teoso, aãuïte Xesosi Kristo pakini sikai ïkinipoko erekari. Iamonïkaina. Ikamaerekaxiniretaina pite.

### Atão Minakati Oerekakani

<sup>3</sup>Masetônia tixinimoni nisikasaaki, nipaniãtai pite Épeso sitatxiti pikaikotini. Uatxa iuaïkana nipaniãtai ereë Épeso pikaikotini. Ikara ninireka, kotxi apanakini ereë auakani oerekari Teoso sãkire kãkitimoni, txamari na atãoni ninoa oerekakiti. Ninirekai pite pinitinina ninoa atão minakati imoerekakanina ïkapani, <sup>4</sup>kotxi ninoa sãpiretapikari kitxakapirïkari pirena. Ninoa xinikapikari aãtokiriakorini uãka, ininiãkara kãkiti taparakienatakakaua iuãkana ixinikasaakina. Põtãkikanako ninoa ikara atoko inakari sãkiretxiti itakanapinina, kotxi ikara sãkiretxiti !oerekari kãkiti Teoso nireëkiti. Teoso sãkire aãuikiniã, aimarotari Teoso nireëkiti. <sup>5</sup>Nipaniãtai pite ikara atoko, kotxi ninirekari ereë Teoso sãkire auiãkani tiretakakiniua. Kãkiti ãkixinire maerekati mauakaniã, ininiã itiretakakaua. Kãkiti imarotakasaakiri ikamakiti ereka

inini, itiretakakaua. Kākiti ikara atoko inakari atão auikari Xesosi sākire. <sup>6</sup>Kākiti, Teoso sākire atão masāpiretakani, takanapari ikara erekari kimaporiti. Pīpinanaākani atoko itxauana, kotxi limarotaikarina Teoso kimapore. Maxikatiika isākirauatapikana. <sup>7</sup>Ninoa kākiti nirekamari Teoso paniātakiti oerekakani ininiuana, txamari limarotarina Teoso paniātakiti. !Imarotarina isāpiretakitina, iuaritika ninoa: “Atāopitika asākire,” itxanātana.

<sup>8</sup>Kākiti atão sāpiretakasaakiri Teoso paniātakiti iōkatakori, iuusaaki aimarotari ipaniātakiti ereka inini. <sup>9</sup>Mauiritakoti aua, kona kākiti atão inakari kamakani ikapanini. Mauiritakoti aua, kotxi maerekati kamakani auapitika. Aua mauiritakoti manireēkani. Aua Teoso manireēkani. Aua maerekati kamakani. Aua erekari manireēkani. Aua Teoso paniātakiti napetakani. Kākiti aua iri okakani. Kākiti aua inoro okakani. Aua kokanirini. Mauiritakoti aua, kākiti ikara atoko inakari ikapani. <sup>10</sup>Aua kākiti āti itanorokata sirīkakari. Aua kākiti āto tanirikata sirīkakaro. Aua kiki āti kikikata sirīkakari. Aua sito āto sitokata sirīkakaro. Aua kākiti āti kākiti itiriākani ivētxitiniri ikapani. Aua aāpirenaāri. Aua kākiti āti apoitakani. Mauiritakoti aua ikara atoko inakari kākiti ikapani. Ninoa !auikari Teoso sākire atão inakari. <sup>11</sup>Ikara Teoso iokanapirena erekari sāpiretaua. Peerekari Teoso. Peerekari iua iokanapirena. Iua paniātano nota iua iokanapirena nisāpiretini ikininapemoni.

### Teoso Amonīkiniri Paoro

<sup>12</sup>Nitxari aāuīte Kristo Xesosi: “Erekari pite kaminano, kotxi pisikataparaxiniretano nota pite ikapani niparīkauatini ikapani. Erekari pauikiniri nisākire. Erekari pimereinino nota pisākire ikininapemoni nisāpiretini ikapani,” nitxari Kristo Xesosi. <sup>13</sup>Meresaaki nota misākirepiretari iua Xesosi. Nasikatikinitana iua sākire auīākani nokinina ikapani. Kaneenamari nitxaua iuusaaki. Iuaritika Teoso amonīkano. !Imisiritano nota, kotxi iuusaaki !nimarotari nikamakiti Xesosi sākire nimauiakani xika. <sup>14</sup>Iuusaaki !erekano. Maerekati nitxaua. Iuaritika aāuīte Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiākara nauikari isākire. Iua nakiti nininiāua, nitiretari iua. Nitiretari apanakini apaka. Mitxi !nimarotari nitiraōkiuatini. <sup>15</sup>Nisāpiretaiko ia sākiretxiti atão inakari, pauikiniri ikapani, ikinimane auikiniri ikapani. Nitxai: “Kristo Xesosi apoka ikorapokoriti maerekati kamakani maerekani

imakatxakini ĩkapani,” nitxa. Maerekati apiata kamakari nitxaua nota. <sup>16</sup>Maerekati apiata kamakari nitxaua, iuaritika Teoso !imisiritano. Iamonĩkano, kotxi inirekari apanakini imarotiniri Kristo matima omanãkarauatakani kãkiti maerekani xika. Xesosi nirekari nota eereka auakani, isãkire auiãkani imarotiniri Xesosi amonĩkinina ninoa, kotxi iua amonĩkano nota maerekati apiata kamakarino. Ninoa auikari isãkire, ininiãkara auapininiika Teosokata. <sup>17</sup>Nitxari Teoso: “Ari Teoso, peerekai. ãtipirika ikinimane auĩte pitxaua. Pipinini !uari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko ãtipirika. Ikinimane ãtipirika sãpiretaiko ereka pinini. Atãopitikara nisãkire. Ameẽ.”

### Xesosi Sãkire Iteene Auikiko

<sup>18</sup>Tximótxio, namarite atoko pitxaua. Nisãpiretai noerekakiti sãkiretxiti pikaminiri ĩkapani. Pixinikariko akokaxiti Teoso sãkire sãpiretakani sãpiretakiti. Ninoa sãpiretai Teoso nirekakiti pite kamini tĩkane. Nota sãkire uatxa ninoa sãkire atokotxikana. Ikara ninoa oerekakiti sãkiretxiti pikamapikako, ininiãkara pite sotato erekari atoko pitxaua Satanasi pinaiatini. <sup>19</sup>Pauikapikariko Xesosi sãkire. Ikara pikeeko atoko itxa. !Pikamapiri pãkixinire mapokaerekatakiniti. Ikara apaka pikeeko atoko itxa. Apanakini kamapekari ãkixinirena mapokaerekatakiniti, ininiã eereka !auikaikarina Xesosi sãkire. Kanaua sakikini atoko itxa ninoa auikiniri Xesosi sãkire. <sup>20</sup>Imeneo inakori, Arexãtri inakori apaka ikara atokokana itxana. Ninoa misãkirepiretari Teoso, ininiãkara nota sikanapana ninoa Satanasi moni. Satanasi misiritakasaakina ninoa, atxiĩti itakanaparina Teoso imisãkirepiretinina.

### Teoso Misãkiretiko Ikinimane ĩkapani

**2** <sup>1</sup>Merepanika nõtãkikai pimisãkiretiniri Teoso ikininape kãkiti ĩkapani. Pimisãkiretariko Teoso ninoa nireẽkiti ĩkapani. Pamanaãriko Teoso sikiniri erekari ninoamoni. Pitxariko Teoso: “Peerekai pite, kotxi erekari pisikakiti kãkitimoni.” <sup>2</sup>Teoso pimisãkiretako auĩtetxiakori apiari ĩkapani, auĩtetxiakori poiãori ĩkapani apaka. Pamanaãriko Teoso ninoa ĩkapani, aũuni ereka inini ĩkapani, neenamtxi mauakani ĩkapani. Ikara atoko aniniã, akamari Teoso nireẽkiti erekarinoka. <sup>3</sup>Ikara akaminiã erekapitikari. Teoso, amaerekani makatxakakari, apokaerekatari asãkire ikara atoko inakari akamini. <sup>4</sup>Teoso nirekari imakatxakiniri ikinimane

maerekani. Inirekari ikinimane imarotiniri atão inakari sãkiretxiti. <sup>5</sup>Ñatinokara Teoso aua. Ñti kikinokara mikanapiriãri kãkiti Teosomoni. Xesosi Kristonokara mikanapiriãri kãkiti Teosomoni, kotxi iuanoka misãkiretari Teoso kãkiti ïkapani. <sup>6</sup>Iua ipina ikinimane kãkiti ïkitxitini ïkapani. Teoso ketotini õti manapi Xesosi ipina. Xesosi ipinini oerekaua Teoso nirekiniri imaktxakiniri ikinimane maerekani. <sup>7</sup>Ininiãkara Teoso akiritano nota isãkire ikinimanemoni nisãpiretini ïkapani. Ininiã Teoso iokanatakiti kãkitimoni nitxaua nota. Ikara nisãkire atão. Kona paxirarini. Teoso akiritano Xoteo minakaniuua noerekini ïkapani. Akiritano atão inakari sãkiretxiti noerekinina ïkapani. Akiritano noerekinina Teoso sãkire auikinina ïkapani.

<sup>8</sup>Ininiã ninirekari kikiakori erekarinoka kamakani, ikini itixiti auakani, misãkiretiniri Teoso. Ninirekari Teoso imisãkiretakasaakina, iusaaki ninirekari isãkire auikinina apaka, ãti imomanatakanina.

### Sitoakoro Xesosi Sãkire Auiãkani

<sup>9</sup>Ninirekari sito mãka atão inini, kiki paxitiniro ïkapani. !Apakata oõuikiniua omãka ereka inini xika. !Erekari sito ãtipirika oeretiniri oiãko kãkiti xikaueretiniro ïkapani. Oro, pérora pakini otakiniã oiõõ kãkiti xikaueretiniro ïkapani, !erekari. !Erekari mãkatxi kakaroneri oieretakini. <sup>10</sup>Sito Teoso nireëkiti nireëkaro kaminiãri erekari, erekapitikari. Mãkatxi peereri atoko itxa erekari okamakiti, kotxi kãkiti atamatari okamakiti. <sup>11</sup>Teoso sãkire sãpiretakari oerekarauatakasaaki, erekari sito kenakotiniri. !Apakata iusaaki osãkirauatini. Erekari opaxitiniri iua, isãkire okĩpitini ïkapani. <sup>12</sup>Nota !auiritaro sito oerekinina kikiakori, ikamakitina tĩkane opaniãtinina. Erekari masãkiretoka onini. <sup>13</sup>Ikara atoko itxa, kotxi merepitipanika Teoso kamari kiki Adão inakori. Eerekaikara ikamaro sito Eva inakoro. <sup>14</sup>Kona Adãoni misirienetaãka. Sitora misirienetapeëka. Oa kamari maerekati, kotxi !okamari Teoso paniãtakiti, ininiãkara !apakata sito paniãtiniri kiki ikamakiti tĩkane. <sup>15</sup>Sito auikiniãri Teoso sãkire, otiretiniãri apanakini, maerekati omakamakaniã, omasarauatakaniã, Teoso makatxakari omaerekani, kotxi ãto sito eenetari Xesosi, amaerekani makatxaãkari.

### Kõtākikarerini Pirena

**3** <sup>1</sup>Ia nisākire atão. Kiki nirekiniāri kõtākikarerini ininiua, Teoso sākire auaiākani ôtākikini inirekiniā, iua nirekari parīkatxi erekari. <sup>2</sup>Ia atoko kõtākikarerini txauako: !Ikamari maerekati, ininiā iua apoitiko !auari. Ātonanirako itanoro. Kūikiteri itxauako. !Katimari omanākarauatini. Ipaxitaākako. Kākiti ātiātaā ĩkani apakapako aapoko. Imarotariko oerekarauatini. <sup>3</sup>Ipoātapeko. Kaneenamari !itxapeuako. Katiraōkiri itxauako. !Ipotxitapiriko neenamaxi. Txineiro iteene !ixinikaperoko. <sup>4</sup>Iua nīkatanako aapoko auakani, ninoa auini ereka ininina tīkane. Itxīkitakanako imiakori ipaniātakiti ikīpitinina ĩkapani, ininiā ninoa paxitari iua. <sup>5</sup>Ikara atoko itxako kõtākikarerini, kotxi aapoko auakani imamimatanīkaretakaniā, ininiā !imarotari kākiti Xesosi sākire auaiākani inīkatini. <sup>6</sup>Kiki mapaōtinoka auikiniāri Xesosi sākire, !apakata iua Xesosi sākire auaiākani ôtākikakari ininiua. Xesosi sākire auaiākani ôtākikakari ininiāua, iuikaua atxiīti. Iuikiniāua, Teoso misiritari iua, kitxakapirīka Satanasi iukasaakiaua imisiritini atokokana. <sup>7</sup>Kiki Xesosi sākire auaiākani ôtākikakari paxitaākako, Xesosi sākire mauaiākani apaka paxitari iua. Ikara atoko ininiā, !ikamapaniri kākiti kamapētatakari. Ininiā Satanasi !imaīkari iua itakapiremoni.

### Kamiparīkarerini Pirena

<sup>8</sup>Ātipekana, Xesosi sākire auaiākani miparīkatakanipekana nisāpiretaiko: Iua kamariko erekari, ipaxitiko tīkane. Ātika isākire itxauako. !Ipoātapeko. !Apakata txineironoka ixinikini. <sup>9</sup>Kamiparīkarerini iteene auikariko Teoso sākire atão inakari. Ākixinire imarotariko ikaminiri Teoso sākire iaōka. <sup>10</sup>Xesosi sākire auaiākani ataerekatariko kiki, kamiparīkarerini ininiua nireēkari. Erekarinoka ikaminiā, ininiā iua auiritaāka ninoa miparīkatakari ininiua. <sup>11</sup>Iua atokokana kamiparīkarerini itanoro kamariko erekari opaxitiko ĩkapani. Aāpirena !okamapeko. !Opoātapeko. Okamariko okamaenetakiti iaōka. Ininiā kākiti auikari osākire. <sup>12</sup>Ātonanirako kamiparīkarerini itanoro. Inīkatariko imiakori, kākiti iua aapoko auakani apaka, ninoa auini ereka ininina ĩkapani. <sup>13</sup>Kamiparīkarerini atão parīkauatiniā, iteene ipaxitaāka. Apanakini apokaerekatari iparīka. Ininiā itaparaxinireritika isāpiretari Kristo Xesosi sākire auikiko kākitimoni. <sup>14</sup>Uatxa pitemoni niōkatsopatakasaaki, ninirekari paītiki nisini hītemoni. <sup>15</sup>Atxiīti uai okanani nauapanika, ininiā ia iōkatsopari

oerekaiko pite Teoso nakitiakori atão auini ikiniõtika, kotxi Teoso aapoko atoko atxaua, iua auiniãtaã ìkapani. Teoso auãki itxapika. Kãkiti iua nakitiakori nìkatari iua sãkire. !Auiritana apanakini koketiniri atão minakati Teoso sãkirekata. Isãpiretana ikinimane Teoso sãkire atão inakari. <sup>16</sup>Peerekari Teoso parîka kãkiti ìkapani. Merepanika kãkiti !imarotari, eereka Teoso oerekari iparîka. Ia atoko Teoso kaminaua ate:

Kãkiti itxapekaua. Iua Xesosi. Erekari Matamatakoti oerekari kãkiti Xesosi sãkire atão inini. Teoso nitiriakori iaxitikini atamatari iua. Isãkire sãpiretaãka ikini itixiti auakanimoni. Kãkiti auikari isãkire. Eereka Xesosi anikaãka iaxiti Teoso tixinemoni.

Ikara atoko inakari Teoso parîka kãkiti ìkapani.

#### Atão Minakati Oerekakani

**4** <sup>1</sup>Iua Erekari Matamatakoti sãpiretaua, apanakini !auikaikari Xesosi sãkire itixi mapotõkire õti takote. Ikara atão. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. <sup>2</sup>Kãkiti ikara atoko inakani sãpiretari atão minakati. Ninoa sãkire ãti, txamari ninoa xinikakiti ipinimoni. Ninoa ãkixinire sãkire !auaika. !Isãpiretaikarina maerekati imakamakanina ìkapani. Kapatakari arikakiti atoko itxa ninoa ãkixinire sãkire. <sup>3</sup>Kãkiti ikara atoko inakani !auiritari kãkiti ìtanorouatini. “!Erekari kãkiti ìtanorouatini,” itxa ninoa sãkire. Teoso kamari ikini nipokori kãkiti nikini ìkapani. Txamari ninoa kamisirienererini !auiritari kãkiti apanakini nipokori inikinina. Teoso nirekari Xesosi sãkire auiaãkani, atão inakari imarotakani, nikiniri ikara nipokori Teoso imisãkiretaka atoko: “Erekapitikai ia nipokori pisikiniãua.” <sup>4</sup>Ikinika Teoso kamakiti erekari. !Apakata kãkiti manirekakaniãri apanakini nipokori. Ikinipoko nipokori hinikasaaki, himisãkiretariko Teoso. Hìtxariko: “Erekapitikai ia nipokori pisikiniãua.” <sup>5</sup>Teoso sãkire sãpiretaua ikinipoko nipokori anikini. Nipokori anikasaaki, amisãkiretiniãri Teoso, nipokori isikakiti eereka inini asãpiretiniãri, ininiã ikara nipokori erekari anikini.

#### Kristo Xesosi Nitiri Erekari Inakari

<sup>6</sup>Aõtariakori põtãkikiniã ikara atoko, Xesosi Kristo nitiri erekari pitxaua. Nipokori sikataparatarari kãkiti ìto. Teoso sãkire aãuiãkiti, oerekaretxi atão inakari, nipokori atoko itxa,

kotxi isikataparatarari axinire. Pite auikapikari oerekaretxi atão inakari. <sup>7</sup>!Pimaãkatapiri miikiteti sãpiretakiti, sãkiretxi Teoso mapokaerekatakiniti. Ikiniõtika piteka poerekauako Teoso paniãtakitinoka pikamini, ininiã Teoso nireëkititxikana pikama. <sup>8</sup>Piïto parĩkauatakasaaki, piïto tapara apiaãpota, ininiã erekari piparĩkauatini. Apiaerekata pixinire parĩkauatini pixinire auãki inini ïkapani. Pixinire ïkorasaaki auãki ininiã, pauapikako Teosokata atipirika. <sup>9</sup>Ikara nisãkire atão. Erekari ikinimane aukiniri ikara. Erekari ikinimane kaminiri ikara. <sup>10</sup>Ininiãkara iteene aparĩkauata Teoso ïkapani. Pasãpaniri, iuaritika aparĩkauatipitipo, kotxi aũuikari Teoso sãkire, Teoso mipĩkati sãkire. Iua ikinimane kãkiti maerekani makatxaãkari itxaua. Iua makatxakari isãkire auiãkani maerekani, maerekani misiritikoãtaã imasikanina ïkapani.

<sup>11</sup>Pipaniatariko kãkiti noerekakiti sãkiretxiti iaõka ikaminina. Poerekana noerekakiti.

<sup>12</sup>Pite atokoripanika, iuaritika pimarotapitikari Teoso sãkire, ininiã !pauiritapiri kãkiti napetiniri poerekakiti sãkiretxiti. Atão inakaranoka pikamako Xesosi sãkire auiãkani atamatini ïkapani, ininiãkara ninoa auikapitikariko pisãkire, ininiã ninoa nirekari pite atoko ininina. Erekarinoka pisãpiretako. Erekarinoka pikamako. Kãkiti pitiretako. Iteene pauikariko Teoso sãkire. Maerekati !pikamapeko. Ikara atoko pininiã, ninoa nirekari pite atoko ininina. <sup>13</sup>Ereë nimapokakanisaakipanika, patatsopatariko Teoso sãkire iõkatsopatakorì, apanakini kenakotiniri ïkapani. Pisãpiretanako Teoso sãkire. Teoso sãkireë põtãkikanako. Poerekana Teoso sãkire atão imarotinina ïkapani. Ikara atoko pitxapikanako, ereë napokini apisapanika. <sup>14</sup>Akokaxiti kõtãkikarerini sãpiretai piparĩka Teoso ïkapani. Iuasaaki ninoa takari iuakona pite nopini, pite ïkapani imisãkiretakasaakirina Teoso. Ikara atoko ininiãkara, pikamapikariko ikara piparĩka Teoso ïkapani. <sup>15</sup>Atipirika pixinikariko ikara nõtãkikinii. Ikiniõtika pikamariko piparĩka Teoso ïkapani. Ininiã apanakini imarotari Teoso sãkire apiaãpota pauikini. <sup>16</sup>Erepaniko pikamakiti ereka inini ïkapani. Erepaniko poerekakiti sãkiretxiti Xesosi oerekakiti iaõka inini. Ikara atipirika pikaminiã, piteka makatxakaua pimapinakani ïkapani. Apaka pimakatxakana pisãkire auiãkani imapinakani ïkapani.

### Ötākipirenatxi Pirena

**5** <sup>1</sup>!Pitxitapiri kiki aneēkari. Pōtākikariko, piri pimisākiretini atokokana. Pōtākikariko kikiakori pite tikini auakani, pitariakori pimisākiretini atokokana. <sup>2</sup>Pōtākikaroko sito aneēkaro pinoro pōtākikini atokokana. Pōtākikaroko ātokoro, pitaro pōtākikini atoko. Iusaaki pipaxitaroko.

### Sitoākini Tikinitakoni

<sup>3</sup>Pinīkatanako sitoākini tikinitakoni onirimane matiretakini. <sup>4</sup>Tikinitakoro oimiakori auiniā, oītariakori anaakori auiniā, ninoa nīkatamaroko oa. Ikara ikaminiāna, erekari Teosomoni. Teoso poxokotana ninoa. Merepanika ninoa kaminiāri erekari ninoaka aapoko āki, aimarotari ninoa atāo auikiniri Teoso sākire, kotxi meresaaki irina, inorona pakini nīkatana ninoa. <sup>5</sup>Tikinitakoro minīkatakoto auikari Teoso inīkatiniro oa. Oa misākiretari iua pokamara, īkanōka pakini inīkatiniro īkapani. <sup>6</sup>Tikinitakoro osarauatininoka nireēkaro, ipīkaro atoko otxaua. <sup>7</sup>Pisāpiretanako ereē auakani, Xesosi sākire auīākani nīkatinina inorona, inorona itaro tikinitakoro pakini. Inīkatiniāna, !apoītaākana. <sup>8</sup>Xesosi sākire auīākani manīkatakaniāri inirimane, itakanaparina Teoso sākire auikinina. Apia maerekanita iua aapoko āki auakani imanīkatakaniā. Kākiti Teoso sākire mauīākati maerekati itxaua. Apia maerekati itxaua iua aapoko āki auakani manīkatakati.

<sup>9</sup>Apanakini sito tikinitakoni moianatana Xesosi sākire auīākani. Pitakariko ninoa tikinitakoni uāka aātsopaā himoianatini īkapani. Sito ikara atoko inakaro sesēta ano apiko auakaro oa. Ātinoka oītanirini. <sup>10</sup>Oa imarotaāka, kotxi erekarinani okama. Atāo oōerekari oimiakori. Osikakienatana ātiātaā īkani. Oimarotaāka, kotxi oa arokakititari kākiti Teoso nakitiakori. Oimarotaāka, kotxi kākiti maerekaxinireni otireta. Oimarotaāka, kotxi ikini sereti erekari ātipirika okama. Tikinitakoro ikara atoko inakoro uāka aātsopaā pitaka himoianatini īkapani.

### Tikinitakoni Ātokoropanika Inakani Ötākikiko

<sup>11</sup>!Pitakapiri tikinitakoro uāka iua aātsopaā, ātokoropanika inakaro, kotxi iuaīkana onirekari kikiakata osirīkini, ininiā onirekari iuaīkana oītaniriuatini, ininiā !onirekaikari Kristo. <sup>12</sup>Ikara atoko okaminiā, okamari maerekati, kotxi mitxi osākire: “Nikamariko parīkatxi Teoso īkapaninani. !Nītaniriuataikako,” otxama. <sup>13</sup>Tikinitakoro



ãtokoropanika inakaro itotari oiarinauatini. Oianapokotapika. Apia maerekati okama, kotxi ototari aãpirena okamini. Onirekari ikinika apanakini kamakiti oimarotini, txamari ikara atoko !apakata. !Apakata ãti kamakiti osãpiretini apanakinimoni. <sup>14</sup>Ikara atoko ininiã, !pitakapiri tikinitakoro ãtokoro inakaro uãka iua aãtsopaã. Nota õtãkikana ãtokoroakoro tikinitakoni iuaĩkana taniriuatini. Erekarı keene ininina, aapokona iparĩkauatinina. Ikara atoko ininiã, Xesosi sãkire mauĩãkani kona misãkirepiretana Xesosi sãkire auĩãkani. <sup>15</sup>Nota ikara atoko nisãpiretai, kotxi ãtikaka tikinitakoni ãtokoroakoro inakani takanapapekari Xesosi sãkire auikinina, Satanasi paniãtakiti ikaminina ĩkapani. <sup>16</sup>Xesosi sãkire auĩãkani inirimanena tikinitikoã, inĩkatanako ninoa. !Erekari imanĩkatakanirina inirimanena tikinitakoni. !Erekari inirekinirina apanakini Xesosi sãkire auĩãkani nĩkatinina inirimanena, kotxi ninoa nĩkatana kaiãopokori tikinitakoni manirimaneni. Pasãpaniri ninoa parĩka.

### Kõtãkikarerini Pirena

<sup>17</sup>Kõtãkikarerini atão kaminiãri iparĩka Xesosi sãkire auĩãkani ĩkapani, erekari hisikinina iparĩkana ĩki apiata. Teoso sãkire isãpiretiniãna apanakinimoni, Teoso sãkire oerekiniãna, ininiãkara erekapitikari apiata iparĩkana ĩki hiĩkitxitinina. <sup>18</sup>Teoso sãkire iõkatsopatakori txari:

!Hĩaxirikanamatapiri kema auĩte iparĩkauatakasaaki,  
triko ikatxaratakasaaki. Pauritariko inikiniri triko iki,  
iparĩkauanãtakasaaki.

Teoso sãkire iõkatsopatakori txari apaka:

Erekapitikari parĩkauatakari apakapiniri iparĩka ĩki. <sup>19</sup>ãti apoĩtiniãri kõtãkikarerı, !pimaãkatapiri isãpiretakiti. Ipi, atxiĩti ipi ãti pakini kãkiti atamatiniãri kõtãkikarerı kaminiri maerekati, isãpiretiniãna pite, pikenakotapitikari ninoa sãpiretakiti. <sup>20</sup>Põtãkikanako Xesosi sãkire auĩãkani maerekati kamakani apanakini Xesosi sãkire auĩãkani apisatoõ, ininiãkara apanakini pĩkari maerekati ikaminina.

<sup>21</sup>Tximótxio, nota paniãtai ikara noerekakiti iaõka pikamini. Teoso apisatoõ, Apiananiri Xesosi Kristo apisatoõ apaka, Teoso nitiriakori iaxitikini imereẽkini apisatoõ apaka, nipaniãtai ikara noerekakiti iaõka pikamini. Ninoa kenakotari nisãkire pitemoni. ãtinokarako pisãkire txauako ikininape kãkitimoni. Erekarı pikamako ikininape

kākitimoni, kākiti pipotxitakinimoni, kākiti pimapotxitakinimoni apaka. <sup>22</sup>Atxiiti aua Teoso sākire auiākari iteene pimimarotakiniti. Ininiā !pimereēpiri iua Xesosi sākire auiākani otākiākari ininiua. Atxiiti ikamapanikari maerekati. Pimereiniāri iua, pite moianatari iua maerekati ikamini. Erepaniko maerekati pimakamakani ikapani.

<sup>23</sup>Pite itokata amianata. Pitsii iriko, ininiākara kona āparaānanini piāta. Ovaā poiāoka apaka piātako pipini ikapani.

<sup>24</sup>Apanakini !ikipatari maerekati ikamakiti, ininiā ikinimane imarotari. Apanakinipekana maerekati ikamakitina !atamataāka ikamakasaakina. Ninoa kipatari. Okananixiti atokoikara imarotaāka ninoa maerekani. <sup>25</sup>Iua atokokana erekari apanakini kamakiti atamataāka. Erekari apanakini kamakiti !atamataāka ikamakasaaki. Iuaritika okananixiti atokoikara imarotaāka.

### Nitiritxi Amotakoni Pirena

**6** <sup>1</sup>Nitiritxi amotakoni, Xesosi sākire auiākani, iteenerako iparīkauatana ipatrāotena ikapani. Ninoa paxitanako ipatrāotena. Ikara atoko ininiāna, Teoso uāka !imisākirepiretaāka. Iua sākire ate oerekakiti apaka !imisākirepiretaāka iusaaki. <sup>2</sup>Nitiritxi patrāote Xesosi sākire auiākari ininiāua, initiri paxitariko iua, kotxi itari apaka itxaua iua. !Apakata poiāonoka ipaxitiniri ipatrāote, itari ininiua xika. Erekari iteene iparīkauatini ipatrāote ikapani, kotxi ipatrāote auikari Xesosi sākire. Teoso tiretakiti ipatrāote. Tximótxio, ikara noerekakiti sākiretxiti poerekariko apanakinimoni. Pōtākikanako ikara iaōka ikaminina.

### Txineiro Potxitakani Pirena

<sup>3</sup>Aua kākiti atāo minakati oereēkani. Ninoa !auikari aūūite Xesosi Kristo sākire atāo inakari. !Auikarina atāo inakari oerekakori, Teoso sākire. <sup>4</sup>Kākiti ikara atoko inakari iuikaua, txamari !kimaroreri. Ipotxitari isākirauatini apanakinikata itaparakiēnatakiniuana ikapani. Ininiākara xikoretxi aua, neenamati aua, misākirepiretakatxi aua. Ininiā kākiti !auikari āti sākire. Iuākatari āti kaminiri maerekati. <sup>5</sup>Ninoa txitakakapikaua, kotxi ixinikakitina maerekatinoka. !Imarotaikarina Teoso sākire atāo inakari mitxi imarotakitina. Ninoa oerekari Teoso sākire kākitimoni txineiro ito apakapinina ikapani. Txamari na atāo ninoa oerekakiti sākiretxiti. !Pimaākatapiri kākiti ikara atoko inakari.

<sup>6</sup>Teoso nireēkitinoka pinirekiniā, ikinipoko pinireēkiti auape, ininiā pākixinire poxokoniuata. Kipa apikomoni pinireka? !Auari. <sup>7</sup>Kiripa

ate mina uai itixi aponaniākasaaki? !Kaminareua. Kiripa aanika atekata apīkasaaki? !Kanikareua. <sup>8</sup>Kamāka aniniā, kanipokore aniniā, apakatape. <sup>9</sup>Satanasi oerekari kākiti maerekati ikamini txineiro apakapini ikapani. Ininiā tiitxi nireēkari mokatanitika kamari Satanasi oereēkiti. !Erekari tiitxi nireēkari nireēkiti. !Kīikiteri iua. Inireēkiti txikatoro atoko, kotxi imaīkari iua. Eereka !auaika itii, itxineirote, ipoxokoni pakini xipope. Inireēkiti xika Teoso iokanatari iua kākiti misiritikomoni. <sup>10</sup>Kākiti iteene potxitiniāri txineiro, ikamari maerekati. Takari aneē, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auiniā, ikini sereti maerekati aneē. Apanakini txineiro potxitakani takanapaāpotari Teoso sākire, ininiākara txineiro potxitakari iuaka karotapekua ākixinireē. Iuaka maerekaxinireti itxīkitakua.

### Paoro Ōtākikiniri Tximótxio

<sup>11</sup>Pitepekana Tximótxio, Teoso paniātakiti kamakari pitxaua, ininiākara ikara maerekati xatiki !pikamape. Atāo inakarinanirako ikiniōtika pikamako. Teoso nireēkitinoka pikamako. Iteene pauikariko Teoso sākire. Katiraōkiri pitxauako. Pimisiritiko auakasaaki, pimīteenekariko. Teoso nireēkitinoka pinirekako. Kona pinirekapiri piteka nireēkiti. <sup>12</sup>Pineenamauatako Teoso ikapani. Ikara neenamati erekari, Satanasi piokanadini, kākiti Teoso sākire auikini ikapani. Papakapariko Teoso sikakiti, kotxi iua akiritai iukata pauapininiika pinini ikapani. Kaiāopokori kākiti imarotari Xesosi sākire iteene pauikini, kotxi ikenakotapekari pisāpiretinina. Peerekari pisākire ninoamoni. <sup>13</sup>Tximótxio, nimisākiretai pite Teoso apisatoō, Kristo Xesosi apisatoō apaka. Ninoakara kenakotari nisākire uatxa. Teoso ikinimane auāki inini txīkitakakari iua. Kristo Xesosi Homano auīte Pōsio Pirato inakori apisatoō auakasaaki, isāpiretari atāo Teoso sākire. <sup>14</sup>Nipaniātai ikara noerekakiti sākiretxiti iaōka pikamini. !Pimamakapiri ikara noerekakiti. Ikara noerekakiti iaōka pikaminiritika aāuīte Xesosi Kristo kanapiriāko. <sup>15</sup>Teoso ketotari Xesosi kanapiriini ōti. Iuasaaki Teoso akiritari Xesosi ikorapokoriti ikanapiriini ikapani. Iuanokara kaposotiireri. Peerekari iua. Auītetxiakori auīte itxaua. Apiarini sauaki iuanokara Apiananiri txaua. <sup>16</sup>Iuanoka !lipina. Iuanokara ikinipoko auāki inini txīkitakakari. Iua auiniātaā iotximere auapika, ininiākara kākiti !iposota imatokotiniri Teoso. !Katamatikori. Kākiti

liposotari atamatiniri iua. Iuanokara kaposotiireri ātipirika. Ātipirika maākiritari: “Peerekari Teoso.” Ameẽ.

### Xesosi Sākire Auiākani Katxineiroterini

<sup>17</sup>Pipaniātanako kākiti katxineiroterini: “Katii hininiã, !hīuikapeuako. !Hīpoxokotapero hītxineirote, kotxi āti ōti atxiīti hītxineirote !luaika. Hīpoxokotariko Teoso, ātipirika auākiri, kotxi iuara sikaua ikinipoko apotxitakiti. Kaiāopokori isikaua. <sup>18</sup>Erekari hīkamako. Hītxineirote kaiāopokoro auini atokokana, erekari kaiāopokori hīkaminanako apanakini. Kaiāopokori hīti auiniã, hīsika kākiti kaamonirimoni. Himarotakasaakiri, matxineiroteni amonitakiti hīsikanako ninoa. <sup>19</sup>Ikara atoko hininiã, hāpotiāpotari erekari Teoso tixinekiri. Iuaã apotiitakori !lixipoka. Ipinaākana atoko, auinapanikana. Ikara atoko hīkaminiã, hāpakapari Teoso sikakiti. Iua txīkitakai hāuapininiika hinini Teosokata.”

Ikara pisāpiretako katxineirotenimoni.

### Paoro Iōkatsopare Mapotōkire

<sup>20</sup>Ari, Tximótxio, atāo pikamariko parīkatxi Teoso sikakiti pitemoni pikamini ĩkapani. !Pimaākatapiri sākiretxi Teoso mapokaerekatakiniti. !Pimaākatapiri kākiti, “Kimaroreno nota,” inakari, kotxi !imarotari imaroretxi atāo inakari. <sup>21</sup>Ninoa sākire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaāpotari Teoso sākire auikinina.

Teoso sikai ikinipoko erekari. Ameẽ.